

■ 29AVEL TOP POP RUMANTSCH

Entaup la primavaira

(rtr) Il novissim 29avel Top Pop Rumantsch è ina collavuraziun straordinaria tranter musica da flad e gruppa da jazz: Ils Brass'n'Jazz ed Ursina Giger interpreteschan «Di per di». El è vegnì preschentà per l'emprima giada sonda, ils 7 d'avrigl 2012 en il «magazin da cultura» da RTR Radiotelevisiun Svizra Rumantscha. Il di cumenza cun buna luna ed ina pluna chaussas da far. Ma la protagonista stauscha avant sai tut ils pensums, fa enstagl chalenders e guarda viador en il mund. «Oz ei semplamein buc miu di» resumescha ella vers la fin da la chanzun, la chanzun che porta il titel «Di per di». Ma la ligerezza da ses chant ed il schlantsch dals sturs davostiers laschan sminar ch'in tal di nunproductiv na saja betg il mender che po capitar. Anzi, igl è pura primavaira quai che quest 29avel Top Pop Rumantsch derasa, cun ses swing universal.

«Brass'n'Jazz» sa numna questa collavuraziun straordinaria da la Musica Vignogn cun la gruppa da jazz Clamür e la chantadura *Ursina Giger*. A l'entschatta stat il project da concerts cuminaivels, inizià dal dirigent *Remo Derungs*; els han lieu durant il mais d'avrigl e duain unir e fructifitgar ils divers stils, dal marsch sur il pop en fin tar il jazz (guarda er sut brassnjazz.ch). La producziun d'ina nova chanzun rumantscha è in rom lateral dal project: Pianist *Christian Müller* ha skizà la melodia, Ursina Giger ha scrit il text ed l'arranschader professiunal *Bela Balint* ha procurà per il rest, dond al toc ina

tempra da swing modern à la Michael Bublé. La registraziun basica ha gi lieu ina dumengia da fin mars en il renomà studio Powerplay a Maur, il chant è vegnì agiuntà a l'Aquarium Turitg intgins dis pli tard, tut sut la reschia da *Manfred Zazzi*. E già gira la chanzun litteralmain «di per di» sur las undas dal Radio Rumantsch (RR), en la solita retscha Top Pop.

La Musica Vignogn exista dapi passa

90 onns, cumpiglia actualmain 32 chaus e vegn oz dirigida da Remo Derungs, reparader d'instruments e fervent fan da swing. Il quartet Clamür, furmà dal pianist Christian Müller, dal saxofonist *Clau Maissen*, dal bassist *Lucas Schwarz* e dal batterist *Andriu Maissen*, celebrescha gist quest onn ses 10avel anniversari e guarda enavos sin ina rotscha projects da tuts genres. Ursina Giger, creschida si a Mustér è mumentan sin via da finir la

scola da jazz a Lucerna e chanta a la testa da numerusas gruppas, tranter quellas l'ensemble da worldmusic Quintinò e sia atgna band «Ursina».

Top Pop Rumantsch è ina seria da produziuns da musica nova ed actuala, lantschada da RTR Radiotelevisiun Svizra Rumantscha l'onn 2005. Tut ils titels da la serie èn d'udir sin la pagina d'internet da RTR sut: <http://www.rtr.ch/home/dossiers/actual/Top-Pop-Rumantsch.html>



Il interprets dal 29avel Top Pop Rumantsch: la Musica da Vignogn e la gruppa da jazz Clamür.